



阮兜這條街

阮兜這條街敢若是三个無仝的世界仝款，街仔頭是店面，中段是倚家，街仔尾是公園。無論是食的、穿的、用的、做議量的，遮攏總有。阮兜就蹓佇遮，逐工出出入入的這條街。

阮兜這條街，逐工上早精神的是街仔尾的公園。天拍晡光，就有厝邊隔壁的阿公、阿媽，街頭巷尾的阿伯、阿姆，有熟似的，嘛有生份的。有的咧運動，有的咧開講、拍納涼。這個時陣，囡仔閣覷佇棉襪被裡咧眠夢。

這條街上早開門做生意的是臺灣式的豆奶店恰西洋式的早頓店，聽講豆奶店佇半暝仔就愛開始攢材料。煮豆奶的大口鼎，燒煙陣陣嗆懸，等待透早起來運動的人客，個上愛食這種古早味的豆奶配油炸粿。這種物件，少年的恰囡仔食袂慣勢啦，個愛食麪配牛奶才合味。人講：「早頓食飽，中晝食巧，暗頓半枵飽。」所以天一下光，就佇遮充電，充甲飽飽飽，予規工充滿活力。

你若行入這條街，會看著一間郵便局予人寄批恰儉錢，有影真利便。服裝店的衫對紅嬰仔賣到做阿祖攏總有，嘛有予阿母嬌噹噹的電頭毛店；予阿爸緣投的剃頭店，閣有花店、藥房、咖啡店……等等，真濟無仝的店面。上心適的是若行佇正手片的亭仔跤，擲頭就會看著鳥仔岫，內底的燕仔嘛恰阮仝款，蹓佇這條街。

我上擋袂牢的是麪店。逐工放學的時，拄好是麪出爐的時間，芳 kòng-kòng、kòng-kòng 芳，啗我吞喙瀾。所以阿母予我的四秀仔錢，我規工攏毋甘用，共伊儉起來買麪。

我上捷去的是便利商店，因為阿母煮食的時，若是欠鹽、欠糖，就隨喝我去買。阿媽講的就無仝矣，阿媽講：「你去二四小時的籤仔店，替我買物件。」對這句話就知影，這條街是有歷史的喔。

阮兜三代人佇這條街行踏，算算咧嘛有半世紀矣，予人的感覺是交通便利袂稀微，食、穿、日用攏四序，倚家安全好厝邊，值得呵佬人情味。

作者：紀春綢

☆詞彙學習☆

【倚家】khiā-ke：住家。

【做議量】tsò-gī-niū/tsuè-gī-niū：消遣、排遣。排解愁悶、消磨時間。

【拍晡光】pah-phú-kng：黎明。

【拍納涼】pah-lā-liàng：又唸作 pah-lâ-liàng。閒扯、講風涼話。

【覷】bih：躲、藏。

【油炸粿】iû-tsiáh-kué/iû-tsiáh-ké：油條。

【儉錢】khiām-tsínn：存錢。

【鳥仔岫】tsiáu-á-siū：鳥巢。

【啗】siánn：引誘。

【喝】huah：大聲喊叫。

【行踏】kiánn-tàh：與人來往。

【稀微】hi-bî：寂寞、寂寥。

【四序】sù-sī：井井有條、妥當。讓人覺得舒服安適的感覺。

【呵佬】o-ló：讚美、表揚。